

PM puji Johor jalin kerjasama dengan swasta
Utusan Online
10 Mac, 2012

JOHOR BAHRU 9 Mac – Perdana Menteri, Datuk Seri Najib Tun Razak memuji langkah kerajaan negeri Johor yang tidak hanya bergantung kepada peruntukan kerajaan Pusat semata-mata sebaliknya mencari alternatif lain bagi membangunkan sekolah agama negeri.

Beliau berkata, usaha kerajaan negeri Johor menjalin kerjasama dengan pihak swasta bagi membina dan membangunkan sekolah agama di negeri ini dilihat sebagai langkah yang bijak dan tepat.

Buktinya, sebanyak 121 buah sekolah agama mampu didirikan di negeri ini dalam tempoh hanya tiga tahun.

“Sekiranya menggunakan kaedah biasa, projek seumpama ini mengambil masa lebih tiga tahun apatah lagi dengan penambahan pelajar yang semakin meningkat.

“Justeru, langkah kerajaan negeri memilih satu kaedah yang lebih kreatif daripada kelaziman iaitu bekerjasama dengan pihak swasta membuatkan projek ini dapat direalisasikan,” katanya semasa merasmikan Sekolah Agama Taman Molek, di sini hari ini.

Turut hadir Menteri Pengajian Tinggi yang juga Ahli Parlimen Pasir Gudang, Datuk Seri Mohamed Khaled Nordin dan Menteri Besar Johor, Datuk Abdul Ghani Othman.

Sekolah agama bernilai RM2.2 juta itu merupakan sebahagian daripada 121 buah sekolah agama yang dibina secara berperingkat-peringkat melibatkan lima fasa dan dijangka siap sepenuhnya pada Oktober tahun depan.

Sebanyak 552 buah sekolah agama telah dibina di negeri ini dengan jumlah pelajar melebihi 210,000 orang.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0310&pub=Utusan_Malaysia&sec=Dalam_Negeri&pg=dn_03.htm